

Poništena građevinska dozvola za Teletovićevu MHE

Kantonalni sud u Mostaru poništio je građevinsku dozvolu firmi „Eko-Vat“ za izgradnju mini hidrelektre (MHE) „Zlate“, koja je u vlasništvu bivšeg košarkaša Mirze Teletovića. Dozvolu je izdalo Ministarstvo građenja i prostornog uređenja Hercegovačko-neretvanskog kantona.

Istom presudom Sud je utvrdio da su mještani Jablanice imali pravo učestvovati u procesu izdavanja potrebnih dozvola za Teletovićevu MHE, što im je Općina Jablanica osporavala.

Sutkinja Neri Mišetić u obrazloženju presude navodi da su učinjene povrede pravila upravnog postupka tokom izdavanja dozvole jer je javnost bila onemogućena aktivno učestvovati i iznijeti stav o izgradnji MHE. Nadležne institucije koje izdaju dozvole su bile dužne osigurati građanima da iznesu svoje mišljenje, zbog čega će postupak morati biti ponovljen.

Sutkinja navodi da je uzela u obzir i presudu Kantonalnog suda u Sarajevu kojom se poništava okolišna dozvola koja je sastavni dio i preduvjet za izdavanje građevinske dozvole.

U ljeto 2021. godine Kantonalni sud u Sarajevu poništio je okolišnu dozvolu za MHE „Zlate“ koju je izdalo Federalno ministarstvo okoliša i turizma. U obrazloženju je navedeno da Ministarstvo nije poštovalo federalne zakonske procedure o osiguravanju učešća javnosti u postupcima izdavanja okolišne dozvole.

Općina Jablanica mora razmatrati žalbu građana o MHE „Zlate“

Ministarstvo je moralo mještanima i javnosti dostaviti Studiju utjecaja na okoliš kako bi bili upoznati sa potencijalnim opasnostima koje izgradnja ovakvog objekta može izazvati.

Sutkinja Aida Šabanović tada je osporila i primjenu Studije jer nisu ispoštovane preporuke Komisije za ocjenu Studije koje su se odnosile na: potrebu za dodatnim pojašnjenjem mjera zaštite nakon eventualnog prestanka rada postrojenja, znatne razlike između Idejnog i Glavnog projekta te poštivanje zakonskih propisa za zaštićeno područje Parka prirode "Blidinje".

„U ovom trenutku nema nijednu validnu dozvolu da centrala radi, tako da je FERK na neki način sad dužan da mu oduzme dozvolu za rad jer je objekat ilegalan, a tu su i nadležni sudovi koji mogu izdati mjeru zabrane rada do okončanja ponovnog postupka“, kaže Dženan Šašić iz Udruženja „Za Doljanku“.

Centar za istraživačko novinarstvo (CIN) je krajem 2019. godine pisao da su institucije firmi "Eko-Vat" izdale dozvole iako nije imala saglasnost mještana putem zbora građana.

Građani faulirani na rijeci Doljanki

Više od 200 mještana je potpisalo peticiju protiv gradnje, ali Općina Jablanica je odbila peticiju i "Eko-Vatu" izdala potrebne dozvole. U razgovoru za CIN direktorica "Aarhus centra u BiH", koji se bavi zaštitom okoliša, rekla je da su takvim propustima prekršeni članovi Aarhusove Konvencije o pristupu informacijama, učešću javnosti u odlučivanju i pristupu pravdi u okolišnim pitanjima koju Bosna i Hercegovina kao potpisnica mora poštovati.

Teletović je u razgovoru sa novinarima CIN-a rekao da investicija u mini hidroelektranu nije zbog profita, već kako bi pravio druge projekte za Jablanicu.

„Uvijek nekome nešto smeta, to je sasvim normalno. Meni je samo krivo što ljudi ne razumiju projekat. Meni je krivo što ljudi ne razumiju mene kao nekoga ko je iz Jablanice“, rekao je tada Teletović.